

Jy kan vanjaar nie na Nampo gaan nie, maar Nampo kom na jou toe. Michris Janse van Rensburg, 'n boer van Bultfontein wie se Backsaver-werktuie jaarliks op die landbouskou by Bothaville te sien is, hou sy eie virtuele Nampo op die plaas Mooiuitzicht wat hy wêreldwyd versprei. Sô werk sy virtuele Boer maak 'n plan-Nampo, berig **Charles Smith**.

Die feit dat die Covid-19-pandemie Nampo se dop-pie finaal vir die jaar geklink het, is 'n nekslag vir baie boere-entrepreneurs. Dit is waar hulle mark is. Jy kan of in sak en as sit of 'n plan maak, sê Michris Janse van Rensburg. Toe maak dié Vrystaatse boer sommer 'n blink boereplan. Sy virtuele Boer maak 'n plan-Nampo begin vandag met 'n video van sy handvervaardigde plaaswerktuie.

Dit kom terwyl hy en sy gesin almal in isolasie op die plaas is weens kontak met iemand wat positief getoets is vir die koronavirus.

Die Backsaver-reeks het die laaste maande uitgebrei met onder meer 'n ligte, sterk draadspanner vir alle veeboere en 'n reeks staal- en kettinglemme vir swaardiens-randsnyers en veldsnyers wat die frustrasie met die nylon-toutjie opskort.

Die jongste patent is 'n toevoeging tot 'n tuinvurk wat jou sommer baie meer hefboomkrag gee om die grond om te dolwe.

Hy het alles op die plaas ontwikkel.

En sy plan is geskoei op die raad van sy seun, Jedri (13), wat in die inperkingstyd sommer self twee patente ontwikkel het.

Jedri het onder meer die J3 Gholf Tool ontwikkel waarmee jy gholfhoue op die grasperk kan oefen sonder om die bal weg te moker.

Janse van Rensburg se eie virtuele Nampo-plan werk so: Hy het 'n video van sy produkte die wêreldwye web ingestuur en wil hê mense moet hom whatsapp vir video's van hoe sy unieke produkte benut word.

“Dis die nuwe bemarkingstrategie. Ek het dan sy nommer en kan altyd weer iets aanstuur, en hulle stoor weer my nommer. Ek gebruik WhatsApp baie.”

Die boere-entrepreneurs het gewag tot die finale Nampo-aankondiging vroeg in Junie. Dis toe weer afgestel.

“Ek was so twee dae baie depressief en het gedink die wêreld gaan my insluk, want ek weet hoe baie Nampo vir my beteken het deur die jare.

“Nampo het maklik drie tot vier maande se werk op 'n keer vir my besigheid geskep.

“En natuurlik was Nampo ook die plek waar 'n mens ou



Michris Janse van Rensburg by sy Boer maak 'n plan-Nampo-uitstalling met 13 patente op sy plaas Mooiuitzicht, Bultfontein.



Backsaver se kunsmistoediener.

As Nampo weg is, maak 'n boer 'n plan!

vriende en ander boere weer sien,” sê Janse van Rensburg.

“'n Mens mis dit. Daai positiewe gevoel wat Nampo gee – almal in die landbou is weer lus vir die lewe met Nampo, maak nie saak hoe droog dit was of watter probleme boere het nie.”

Hy sê die virtuele Nampo is in 2020 ingestel toe die uitstalling buite Bothaville self afgestel is, maar dit het nie regtig die sukses gehad wat hulle gehoop het nie.

Dus het hy besluit om self in te spring.

“Ek het nie die idee gekry net omdat dit 'n goeie plan is nie, maar uit desperaatheid ook. Hoe red 'n mens sô 'n mooi, spesiale besigheid as dinge voel als is teen 'n mens?”

Die hele ervaring van voorbereiding was spesiaal, sê hy.

“Ek het weer daai opgewondenheid ervaar van die vooruitsigte van Nampo. 'n Mens besef nie hoe deel het Nampo geraak vir ouens soos ons wat deurwinterde Nampo-uitstallers is nie.

“Selfs my werkers het hernude energie getoon met die voorbereiding.”

Janse van Rensburg sê hy hoop om ander entrepreneurs te oorreëd om dieselfde te doen.

“Ek hoop dié kan vir hulle ook werk. Ek glo dit sal.”

Hy het deur die jare meer as 20 produkte ontwikkel en ver-



Nampo het maklik drie tot vier maande se werk op 'n keer vir my besigheid geskep. En natuurlik was Nampo ook die plek waar 'n mens ou vriende en ander boere weer sien.

— Michris Janse van Rensburg

vaardig. Nou het hy mooi gaan dink wat die mees relevante produkte is, ook sodat die video vir Boer maak 'n plan-Nampo nie te lank is nie.

Van die kleinste boer tot die heel grootste boer kan die produkke wat hy gekies het, inspan.

Sy Backsaver-produkte, veral die klein planters en ploë, is al in 14 Afrika-lande, onder meer Zambië, beskikbaar. Dit neem tyd om die vertroue in die produkte te laat groei. In landbou is die beste bemarking die woord wat van plaas tot plaas versprei word.

“Ons bou nie implemente nie, ons bou oplossings. Elke produk bied 'n oplossing vir 'n spesifieke probleem wat boere beleef.”

Covid-19 het dit moeilik gemaak om by te hou by besigheid in die res van Afrika. Sy fokus moes verander en hy moes gaan kyk wat het sy eie buurman nodig.

“As ek iets vir my buurman kan bou, kan sy buurman ook 'n kliënt word,” som hy sy Backsaver-plan vir 2021 op.

Al sy bloedsweet en pyn deur die jare kon nie verniet gewees het nie.

Dit is egter nie so maklik vir enige boer om 'n entrepreneur te word as dit begin swaar gaan weens droogtes en ander uitdagings op die plaas nie, beantwoord hy baie boere se vraag.

“Baie boere wil iets anders doen om te oorleef, maar mense se persoonlikhede verskil. Vir die meeste is dit net nie moontlik nie, maak nie saak hoe 'n goeie boer hy is nie.

“My stokperdjie as boer het weer my besigheid geword.

“Ek hoop regtig dit gee momentum vir ander besighede wat in dieselfde bootjie as ek is en wys vir hulle om nie moed op te gee nie. Ons kan 'n plan maak.

“Baie van ons het nie 'n vertoonkamer soos groot landbou-besighede nie.

“Nampo was ons Wêreldbeker-oomblik. Jy het net een kans, en toe is dit weg. Nou moet jy self die drieë druk.”

Dit is waar sy oorlewingsin-

stink, vaardighede, ondervinding en probleemoplossing gelik ingeskop het.

By Nampo het hy ook geluister na boere se raad. Dit is wat sy verbeelding aan die loop sit snags as die res van die gesin slaap.

“Dit is 'n baie belangrike deel van my produktontwikkeling. Daar is min mense so slim soos 'n boer van Suid-Afrika. Regtig, ons is 'n unieke spesie.”

Mense moet op die uitkyk wees vir 'n virtuele vlag van 'n boer van Bultfontein wat hoog wapper en steeds oplossings vir boere in Zambië en Zimbabwe én Suid-Afrika bied wat keelvol is vir goedkoop Chinese werktuie wat gou breek.



Smith is Netwerk24 se nuusredakteur in Bloemfontein.



Jedri Janse van Rensburg (13) het in die inperkingstyd op die plaas twee patente ontwerp en gebou. Hier is hy by sy J3 Gholf Tool waarmee jy gholfhoue op die grasperk kan oefen sonder om die bal weg te moker. Foto: LANDBOUWEEKBLAD



Backsaver se draadtrekker is klein, sterk en maklik hanteerbaar vir die span van heinings.



Backsaver se planter met 'n klein enjin vir kleinboere.



Die staal- en kettingwerktuig vir swaardiens-randsnyers en veldsnyers is Michris Janse van Rensburg se jongste ontwerp.